

Minister Otmar Oduber ta aclarea:


Proyecto incinerator ta un B00 "Builder Owner Operator" y gobierno no ta hinca placa aden

ORANJESTAD (AAN) – Minister di Infraestructura, Medio Ambiente y Desaroyo Territorial sr. Otmar Oduber, den conferencia di prensa di gobierno, Dialuna, a trece un aclaracion tocante cierto informacionnan cu ta circula den comunidad, tocante e proyectonan pa maneho di sushi, y cu e dignatario ta indica, cu ta informacionnan incorrecto. Minister Oduber a señala cu, constantemente, esnan cu ta purba pa e proyecto serio aki fracasa, ta menciona cu gobierno lo inverti 300 milyon florin den e planta loke no ta cuadra di berdad.

E mandatario a expresa cu gobierno no sa di un suma di 300 milyon dollar ni ken ta e expertonan cu ta papiando di e suma aki. En todo caso, el a indica cu no ta un suma cu gobierno ta bay hinca den e proyecto. El a splica cu el a scucha su opositornan bisa cu e ta un proyecto PBP, cual tampoco ta e caso, y e mandatario ta lamenta cu den e proceso aki, ta purba di desinforma nos comunidad.

E mandatario a subraya cu e ta lamenta cu tin ken kier pa e proyecto fracasa siendo cu tur hende ta mira tur dia cu e dump mester di atencion y solucion pa e situacion sumamente deplorable cu tin na e momentonan aki.

El a aclara cu ta trata di un proyecto "Build Owner Operator (BOO),



y den varios caminda di e documento esaki ta hinca tambe. E ta exactamente mescos cu esun di e mulinanan di biento na Vader Piet, unda tambe e doño a construi, ta opera y vende su producto. Pues, tin nada cu gobierno ta bay hinca placa den dje, of ta esun cu mester haci un PBP project.

Minister Oduber ta haya cu ta bon pa kita e discusion aki for di caminda, ya cu den e caso aki gobierno ta verwacht y ta spera cu e proceso cu ta bay cana den e siguiente buelta, cu ta conforme e propio companianan cu aña pasa tabata parti di e Request for Information, y a base di e propio expertonan cu ta 22 compania cu a participa den e proceso aki, incluyendo companianan di Aruba, den su mayoria a muestra cu esaki ta e caminda cu mester encamina.

E dignatario a expresa cu

gobierno no tin suficiente tereno pa sigui dera sushi, y no tin otro volumen pa separa y biba a base di reciclahe di sushi, y pesey e mayoria di compania cu a inscribi tabata muestra den e direccion pa bin cu un tipo di incinerator, unda e mansa, e volumen di sushi ta wordo kima y di e forma ey genera fondonan door di vende coriente.

E minister a reitera cu no ta gobierno a bin cu e direccion aki sino un grupo di experto cu a sinta hunto y a yega na e conclusion aki conhuntamente cu e participacion di e companianan internacional pa loke ta trata e proceso di Solid Waste Treatment Facility (SWTF),

E mandatario ta spera cu pa dia 31 lo haya companianan interesa y si esey no ta e caso lo mester bay bek wak kico lo ta e siguiente pasonan. Ultimo desaroyo cu gobierno kier mira, ta bolbe na e situacion di tira sushi na e dump na Parkietenbos cual no ta e solucion pa ningun hende, pero naturalmente e solucion mester ta uno duradero pa henter nos comunidad.

Telefonnan di
DIARIO
582-6747
Fax 582-8551